

نسيت نفسي



انا اسف
عشان الوقت متأخر
نسيت نفسي
نسيتني الوقت
لغيت عقلي
لكن دلوقت بتذكر
حاجات محتاجة تتفسر
ولما بافوق من التوهة
بالاقى الوهم متعكر
فاتوه اكثر
أتاري الخمر جوايا
بيشرب منى وبيسكر
فمتلومينيش
على سهدي

ولاتشديش
طريق فرحي
قوليلي ازاي
أكون فايق
عشان ماهربش
م التوهة
وارجع تاني متأخر
أنا آسف
وصلت ف وقت متأخر
وكان حجم البعاد أكبر
من المسافات
رميت السهم بين ضلعي
حاولت أقتل
وطن واقف على حدودك
فصاب السهم جوف مركب
هناك على شط ف حدودك
وغرقت مركبي بيا

ولساني على سدودك
ياريت اقدر أكون جنبك
واحرك سحر تعويدك
وألقاكي طريق مرمر
واقولك بس سامحيني
عشان هاخرج من المنظر
واتاري الوقت متغير
وسابح زيي في الملكوت
لكني وصلت متأخر
لنبح الصوت
أنا آسف
ماصدقتش
يا موج البحر موالك
فتنت عليها قولتلي
ماهيش جاية
ماصدقتش
رميتك وبكلام جارح

وقولت عليك ما بتحسش
مشاعر عذبة يا مالح
أنا آسف وبترجاك
يا موج سامح
انا غلطان
وم الليلة
هاصدق كل أصدافك
وقبل ما اقرر اني اجي
هاوشوش رملك الأول
ولو قال لي بلاش تيجي
ها اصدق حتى لو كداب
أنا آسف
دموع البحر معدودة
ونبضك ضحكة مكبوتة
وصورتك لسه ممدودة
على حروف الزمن واقفة
بتغزل م الدموع دقات

ودقة تمرّ والتانية
وألاقي الوقت تاه مني
وجيت على حد مستني
وخذني لسكة منسية
من الأوقات
أنا آسف
لأنى تملي متأخر
على البدايات